



MEMORIA XUSTIFICATIVA DA PROPOSTA DE CONVENIO DE COOPERACIÓN EDUCATIVA ENTRE A ADMINISTRACIÓN XERAL DA COMUNIDADE AUTÓNOMA DE GALICIA, A TRAVÉS DA CONSELLERÍA DE MEDIO AMBIENTE E ORDENACIÓN DO TERRITORIO, E A UNIVERSIDADE DA CORUÑA PARA A REALIZACIÓN DE PRÁCTICAS ACADÉMICAS EXTERNAS

I.- ANTECEDENTES.

O Decreto 167/2015, do 13 de novembro, polo que se establece a estrutura orgánica da Consellería de Medio Ambiente e Ordenación del Territorio denominada, no sucesivo, “a CMAOT”, atribúe a este departamento e aos seus órganos dependentes competencias e funcións en materia de ambiente e, en particular, o impulso da investigación ambiental e o desenvolvemento tecnolóxico e a súa posta en marcha para o logro da adecuada protección ambiental e o desenvolvemento de estudos e informes, en concreto, en relación as funcións de avaliación e control da incidencia da actividade humana sobre o ambiente, o fomento de sistemas e estratexias de corrección de dita incidencia, a avaliación dos efectos de plans e programas no ambiente e a xestión dos sistemas de observación ambiental e predición meteorolóxica de Galicia.

Por outra banda, o artigo 1 da Lei Orgánica 6/2001, de 21 de decembro, de Universidades, establece que estas institucións realizarán o servizo público de educación superior mediante a investigación, a docencia e o estudo conferíndolles, entre outras funcións, a creación, desenvolvemento, transmisión e crítica da ciencia, da técnica e da cultura; a preparación para o exercicio de actividades profesionais que esixan a aplicación de coñecementos e métodos científicos e para a creación artística; ou a difusión, a valorización e a transferencia do coñecemento ao servizo da cultura, da calidade da vida, e do desenvolvemento económico.

II.- OBXECTIVOS DO CONVENIO PROPOSTO E RAZÓNS DE OPORTUNIDADE.

O convenio proposto ten por obxectivo dar cumprimento ás respectivas competencias das entidades convenientes, proporcionando aos alumnos da Universidade a posibilidade de complementar a súa formación coa realización de prácticas nas dependencias da CMAOT adscritas ao desenvolvemento das funcións citadas anteriormente.





III.- BASES XURÍDICAS.

O Convenio enmárcase nas relacións de colaboración que lle é dado entaboar entre si ás Administracións públicas para o mellor desenvolvemento das súas respectivas competencias, segundo prevén os artigos 47 e seguintes da Lei 40/2015, de 1 de outubro, de Réxime Xurídico do Sector Público.

En cumprimento deste precepto, a proposta de convenio detalla a identidade, capacidade e representación dos asinantes xunto coas respectivas competencias exercidas polas entidades convenientes, os obxectivos perseguidos coa sinatura do instrumento, as actuacións que cada unha das convenientes se compromete a desenvolver para o seu logro, o prazo de vixencia do convenio e as causas que darán lugar á súa extinción.

No aspecto financeiro, déixase constancia de que o desenvolvemento do convenio non da lugar a gastos que precisen un financiamento específico con cargo aos presupostos das entidades asinantes.

Como cautela específica para preservar os intereses da Xunta de Galicia, indícase que a realización das prácticas formativas non xerará vínculos laborais ou de calquera outra índole entre os/as alumnos/as en prácticas e a Administración autonómica

Constitúese un órgano mixto de vixilancia e control co fin de resolver as dúbidas que se poidan suscitar na interpretación e cumprimento do convenio.

Por último, indícase expresamente que o convenio ten natureza interadministrativa, segundo o disposto no artigo 47.2 a) da Lei 40/2015, de 1 de outubro, polo que o coñecemento dos eventuais litixios que se puidesen suscitar en relación co mesmo recae na Xurisdición Contencioso - Administrativa.

IV.- COMPENSACIÓN POR GASTOS INCORRIDOS.

Non procede, dado que, como xa se indicou, o cumprimento do convenio non xera gastos obxecto de financiamento específico con cargo aos orzamentos das entidades asinantes.





Para a tramitación do convenio, tense observado o cumprimento dos requisitos establecidos na Lei 40/2015, do 1 de outubro, de réxime xurídico do sector público.

Santiago de Compostela

A directora xeral de Calidade Ambiental e Cambio Climático

María Cruz Ferreira Costa

(Asinado dixitalmente)

